

Na osnovu člana 13. Zakona o principima lokalne samouprave u Federaciji BiH ("Službene novine Federacije Bosne i Hercegovine", broj: 49/06), člana 7. Zakona o ministarskim, vladinim i drugim imenovanjima u Federaciji Bosne i Hercegovine („Službene novine Federacije BiH”, broj: 12/03, 34/03 i 65/13) i člana 18. Statuta Općine Maglaj ("Službene novine Općine Maglaj", broj: 8/07,3/08 i 6/08), Općinsko vijeće Maglaj je, na svojoj ____ sjednici održanoj dana _____ 2017. godine, donijelo

ODLUKU

o postupcima, standardima i kriterijima imenovanja na pozicije u reguliranim organima općine Maglaj

I - OPĆE ODREDBE

Član 1.

Ovom Odlukom se utvrđuju standardi i kriteriji za postupak izbora kojim se vrši imenovanje na upražnjene pozicije u reguliranim tijelima općine Maglaj definisanim u članu 3. ove Odluke, princip izbora, način oglašavanja, imenovanje komisije za izbor, razmatranje prijave kandidata, obavljanje intervjua, donošenje odluka o imenovanju, podnošenje prigovora na imenovanja i druga pitanja regulisana odredbama ove Odluke.

Član 2.

Općinsko vijeće Maglaj je odgovorni javni službenik u smislu Zakona o ministarskim, vladinim i drugim imenovanjima u javnim ustanovama, javnim preduzećima i drugim subjektima za koje je donijelo ili donosi odluku o osnivanju.

Član 3.

U smislu ove Odluke regulirana tijela Općine Maglaj su:

- a) **Skupština, Nadzorni odbor i Odbor za reviziju Komunalnog javnog društva Maglaj d.o.o,**
- b) **Nadzorni odbor JP „Veterinarska stanica“ Maglaj,**
- c) **Upravni odbor JU „Dom zdravlja“ Maglaj,**
- d) **Upravni odbor JU „Narodna apoteka“ Maglaj,**
- e) **Upravni odbor JU „Narodna biblioteka“ Maglaj**
- f) **Upravni odbor JU Dom kulture „Edhem Mulabdić“ Maglaj,**
- g) **Upravni odbor JU „Centar za socijalni rad“ Maglaj,**
- h) **Upravni odbor JU „Dječiji vrtić“ Maglaj.**

II - OSNOVNI PRINCIPI

Član 4.

Imenovanja iz ove Odluke vrše se uz poštivanje slijedećih principa:

- **Zakonitosti:** Općinsko vijeće osigurava da se sva javna imenovanja vrše na zakonit način i u skladu sa svim važećim pravilima, propisima i zakonima.
- **Kvalitet:** glavni princip kojim se rukovode sva imenovanja je princip izbora na osnovu kvaliteta putem dobro informiranog izbora lica koja po svojim sposobnostima, iskustvu i kvalitetima odgovaraju potrebi upravnog odbora odnosno nadzornog odbora koji je u pitanju.

- **Otvorenosti i transparentnosti:** princip javnosti upravljanja primjenjuju se na proces imenovanja. Funkcioniranje procesa mora biti transparento, osim ako informacija nije povjerljiva, kako je to definisano odredbama Zakona o zaštiti ličnih podataka (Službeni glasnik BiH br 49/06). Pojediniosti o imenovanjima moraju se objaviti.

Član 5.

Općinsko vijeće Maglaj kao odgovorni javni službenik ima konačnu obavezu da osigura da se sva imenovanja izvrše u skladu sa Zakonom i odredbama ove Odluke, kao i da osigura da se nijedno konačno imenovanje u regulirane organe ne obavi ukoliko nisu primjenjene odredbe zakona i ove Odluke.

III - STANDARDI I KRITERIJI

Član 6

Kandidati za imenovanje/ nominiranje na upražnjenu poziciju u reguliranim tijelima Općine Maglaj treba da ispunjavaju opće i posebne uvjete.

Član 7.

Svi kandidati za imenovanje dužni su da ispunjavaju sljedeće opće uvjete:

(1) Opći uvjeti za imenovanja/nominiranja na upražnjenu poziciju u reguliranim tijelima Općine Maglaj su:

- a) da je državljanin Bosne i Hercegovine,
- b) da je stariji od 18 godina,
- c) da nije otpušten iz državne službe kao rezultat disciplinske mjere (bilo na nivou države ili entiteta) u periodu od tri godine prije dana objavljivanja upražnjene pozicije,
- d) da se na njih ne odnosi član IX.1. Ustava Bosne i Hercegovine,
- e) da nije na funkciji u političkoj stranci u smislu člana 5. Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije Bosne i Hercegovine", broj: 12/03, 34/03 i 65/13),
- f) da nije član organa zakonodavne, izvršne ili sudske vlasti ili savjetnik u smislu Zakona o sukobu interesa u organima vlasti u Federaciji Bosne i Hercegovine ("Službene novine Federacije Bosne i Hercegovine", broj 70/08),
- g) da nema privatni i/ili finansijski interes u instituciji u kojoj se kandiduje,
- h) da nije osuđivan za krivično djelo nespojivo sa imenovanjem na dužnost u instituciji u koju se kandiduje, pet godina od dana pravosnažnosti presude, isključujući vrijeme zatvorske kazne,
- i) da mu nije izrečena zaštitna mjera zabrane obavljanja aktivnosti, tri godine od dana pravosnažnosti odluke o izrečenoj zaštitnoj mjeri,

(2) Dokaz da kandidat nije osuđivan za krivično djelo od nadležnog Ministarstva unutrašnjih poslova službeno će se tražiti za kandidate koji budu predloženi za konačna imenovanja.

Član 8.

Kandidati za imenovanje/ nominiranje na upražnjenu poziciju u reguliranim tijelima Općine Maglaj treba da ispunjavaju posebne uvjete. i to:

(1) Za članove skupštine, odbora za reviziju i nadzornog odbora:

- posebne uslove /uvjete propisane odgovarajućim zakonom koji reguliše oblast za koju je osnovan i registrovan regulirani organ, odnosno uvjete za određenu poziciju u reguliranom tijelu i (ili):

- a) VSS, VII stepen stručne spreme, dokaz o završenom visokom obrazovanju, odnosno prvog (najmanje 240 ECTS bodova) drugog ili trećeg ciklusa Bolonjskog sistema studiranja. Izuzetno, posebni uslov može biti VŠS ili SSS -stručne spreme, kada je očigledno neophodno osigurati sastav reguliranih tijela predstavnika građana, roditelja, zaposlenika, korisnika ili suvlasnika udjela,
- b) najmanje tri (3) godina radnog iskustva nakon sticanja visoke stručne spreme, odnosno pet (5) godina nakon sticanja VŠS ili SSS,
- c) da nije član nadzornog ili upravnog odbora, odnosno odbora za reviziju nekog privrednog društva ili institucije,
- d) da nije vlasnik ili član uprave nekog privrednog društva ili institucije,
- e) da posjeduje stručno znanje iz oblasti rada i organizacije privrednih društava, kao i da posjeduje Certifikat o završenom usavršavanju izdat od strane nadležnog organa, a u skladu sa važećim odredbama Uredbe o usavršavanju predsjednika i članova nadzornih odbora i uprava privrednih društava sa učešćem državnog kapitala Vlade Federacije BiH,
- f) komunikacijske i organizatorske sposobnosti,
- g) sposobnost tumačenja propisa iz oblasti za koju je regulirani organ osnovan,
- h) sposobnost upravljanja finansijskim i ljudskim resursima,
- i) poželjno poznavanje stranih jezika.

Prilikom procjene posebnih uslova/uvjeta, kriteriji navedeni pod tačkama od e) do h) izrazit će se u bodovima od 1-5.

(2) Za članove upravnih odbora:

- posebne uslove /uvjete propisane odgovarajućim zakonom koji reguliše oblast za koju je osnovan i registrovan regulirani organ, odnosno uvjete za određenu poziciju u reguliranom tijelu i (ili):
- a) VSS, VII stepen stručne spreme, dokaz o završenom visokom obrazovanju, odnosno prvog (najmanje 240 ECTS bodova) drugog ili trećeg ciklusa Bolonjskog sistema studiranja. Izuzetno, posebni uslov može biti VŠS odnosno SSS stručne spreme, kada je očigledno neophodno osigurati sastav reguliranih tijela predstavnika građana, roditelja, zaposlenika, korisnika i sl.
 - b) najmanje tri (3) godina radnog iskustva nakon sticanja visoke stručne spreme, odnosno pet (5) godina nakon sticanja VŠS ili SSS,
 - c) da nije član nadzornog ili upravnog odbora, odnosno odbora za reviziju nekog privrednog društva ili institucije,
 - d) da nije vlasnik ili član uprave nekog privrednog društva ili institucije,
 - f) komunikacijske i organizatorske sposobnosti,
 - g) sposobnost tumačenja propisa iz oblasti za koju je regulirani organ osnovan,
 - h) sposobnost upravljanja finansijskim i ljudskim resursima,
 - i) poželjno poznavanje stranih jezika.
- Prilikom procjene posebnih uslova/uvjeta, kriteriji navedeni pod tačkama od f) do h) izrazit će se u bodovima od 1-5.
 - Ukoliko su zakonima iz stava (1) alineja 1. propisani drugačiji posebni uslovi/uvjeti, tada važe uslovi/uvjeti propisani tim zakonom.

IV - OGLAŠAVANJE UPRAŽNJENE POZICIJE

Član 9.

Oglas za upražnjenu poziciju se obavezno mora objaviti u **“Službenim novinama Federacije BiH”** i jednom dnevnom listu velikog tiraža s ciljem da bude dostupan najširoj javnosti, kao i na službenoj web stranici Općine Maglaj. Obavezno se čuva sva evidencija vezana za oglašavanje upražnjenog mjesta.

Član 10.

Oglas za upražnjenu poziciju sadrži:

- (a) opis upražnjene pozicije, uključujući i pojedinosti o ulozi potencijalnog kandidata,
- (b) opšte uslove/uvjete koje je potrebno ispunjavati za tu poziciju iz člana 7. stav 1. tačka od a) do i) i posebne uslove/uvjete iz člana 8.,
- (c) ostale uslove koje je potrebno ili poželjno ispunjavati za tu poziciju,
- (d) ako se za poziciju traži da se ispuni obrazac prijave, uputstva kako se obrazac može dobiti,
- (e) spisak potrebnih dokumenata, rok i mjesto za podnošenje prijave. Krajnji rok za podnošenje prijave ne smije biti kraći od 14 dana od dana objavljivanja oglasa o upražnjenosti pozicije u **“Službenim novinama Federacije BiH”**.

Član 11.

Oglas o upražnjenosti pozicije treba da bude dovoljno detaljan da bi kandidatima dao potpunu informaciju o ulozi koju treba vršiti u upravnom odboru odnosno nadzornom odboru, nadoknadi, uslovima i dužini trajanja imenovanja i mogućnosti ponovnog imenovanja.

Član 12.

Osim ako se svakom kandidatu ne dostavlja pisana odbijenica u oglasu o upražnjenosti pozicije mora se jasno naglasiti da oni podnosioci prijave sa kojima se ne stupi u kontakt u određenom roku, a nakon roka za podnošenje prijave neće biti uzeti u razmatranje u daljem procesu imenovanja.

V- NAČIN IMENOVANJA, SASTAV I DJELOKRUG KOMISIJE ZA IZBOR

Član 13.

Komisiju za izbor, za svaki pojedinačni postupak izbora, imenuje Općinsko vijeće Maglaj na prijedlog Općinskog Načelnika i ista je zadužena za pripremu teksta oglasa prijema, pregledanje obavljanje intervjua i ocjenu prijave.

Član 14.

Komisija za izbor se sastoji od pet članova ovisno od reguliranog tijela za koje se postupak izbora provodi, od kojih je jedan predsjednik Komisije.

Ako je posebnim zakonom propisan broj i sastav komisije, tada će se primjenjivati odredbe tog zakona. Odlukom o osnivanju komisije za izbor regulirat će se i naknada za njen rad.

Član 15.

Komisija za izbor pregledat će sve prijave koje pristignu u propisanom roku.

Komisija će na osnovu principa iz člana 4. ove Odluke i kriterija za imenovanje sastaviti listu s uжим izborom najboljih kandidata koji ispunjavaju kriterije za imenovanje.

Ni jedan kandidat neće biti stavljen na listu užeg izbora, a ukoliko nije povoljno ocijenjen prema kriterijima za imenovanje.

Sve odluke, uključujući i one koje sadrže odbijenice, moraju u potpunosti biti dokumentovane i moraju se čuvati u službenoj evidenciji.

Član 16.

Prilikom obavljanja intervjua, Komisija za izbor poziva sve kandidate koji su ušli u uži izbor na intervju.

Intervju se mora obaviti u skladu sa principima iz člana 4. ove Odluke.

Sve odluke koje potiču sa intervjua, uključujući i one sa odbijenicom, u potpunosti se dokumentuju.

U toku intervjua komisija za izbor osigurat će sljedeće:

- da su svi kandidati u potpunosti upoznati sa standardom ličnog integriteta koji se traže za lica imenovana na javnu poziciju,
- da su pitanja o sukobu interesa objašnjena i razmotrena detaljno sa svim kandidatima,
- svaki kandidat koji je pozvan na intervju mora ispuniti obrazac u kojem će iznijeti bilo koje pitanje ili mogućnost koja bi mogla dovesti do sukoba interesa ukoliko dođe do njegovog imenovanja,
- da su svi kandidati u potpunosti informirani o pravu javnosti putem mehanizama koji su detaljno navedeni u Zakonu o ministarskim, vladinim i drugim imenovanjima u Federaciji BiH,
- da se može uložiti prigovor protiv imenovanja koje se razmatra.

Član 17.

Nakon intervjua i na osnovu u potpunosti dokumentovanih odluka svakog člana komisije, Komisija za izbor će putem pisane preporuke predložiti rang-listu sa najboljim kandidatima Općinskom vijeću na daljnje razmatranje.

Pisana preporuka sadrži sve relevantne informacije koje komisija za izbor ima o kandidatima i njene preporuke.

Član 18.

Nakon što komisija za izbor dostavi prijedlog rang-liste kandidata Općinskom vijeću, Vijeće će, osim ako ima opravdane razloge, da vjeruje da principi i procedure utvrđeni ovom odlukom nisu ispoštovani ili da bi imenovanje bilo kojeg od kandidata s predložene liste s užim izborom dovelo do sukoba interesa, donijeti odluku o konačnom imenovanju kandidata koji su imali najbolje rezultate i poziciju na rang-listi u skladu sa postojećim zakonima, pravilima i propisima

Isti postupak se provodi i kada Općinsko vijeće utvrđuje Prijedlog Odluke o utvrđivanju liste kandidata, ako je riječ o izboru nadzornog odbora i odbora za reviziju u privrednim društvima sa učešćem državnog kapitala koja se prosljeđuje Skupštini Društva a koja vrši konačna imenovanja.

VI – OBJAVLJIVANJE IZBORA U SLUŽBENIM NOVINAMA

Član 19.

Sva konačna imenovanja se odmah objavljuju u „Službenim novinama Općine Maglaj“, o čemu se stara Općinsko vijeće Maglaj, a realizuje Služba za stručne poslove Općinskog vijeća Maglaj.

VII - PRIGOVORI

Član 20.

U slučaju kada postoje dokazi da principi utvrđeni u članu 4. Ove Odluke ili postupci nisu ispoštovani, zainteresirana stranka može u roku od 7 (sedam) dana podnijeti prigovor na konačno imenovanje.

Prigovor se podnosi Općinskom vijeću, koje dostavlja kopiju Ombudsmenu za ljudska prava Bosne i Hercegovine.

Član 21.

Općinsko vijeće će u roku od sedam dana od dana prijema prigovora obavijestiti podnosioca prigovora o ulozi Ombudsmena.

Po prigovoru se sprovodi postupak u skladu sa Zakonom.

Općinsko vijeće će postupiti po preporuci Ombudsmena.

VIII - PRELAZNE I ZAVRŠNE ODREDBE

Član 22.

Lični podaci o podnosiocima prijave su tajni i mogu se prikupljati i obrađivati samo u skladu sa odredbama Zakona o zaštiti ličnih podataka Bosne i Hercegovine („Službeni glasnik BiH”, broj: 49/06).

Član 23.

Odluke o osnivanju javnih ustanova i javnih preduzeća, odnosno drugi osnivački kao i ostali akti kojima je regulirano pitanje imenovanja upravnih odbora i drugih reguliranih organa, uskladit će se sa odredbama važećih zakona ove Odluke.

Član 24.

Stupanjem na snagu ove Odluke prestaje da važi Odluke o utvrđivanju standarda i kriterija za imenovanje na upražnjene pozicije u reguliranim tijelima općine Maglaj („Službene novine Općine Maglaj», br. 8/04, 5/11 i 1/17),

Član 25.

Ova Odluka stupa na snagu osam dana od dana objavljivanja u “Službenim novinama Općine Maglaj”.

PREDSJEDAVAJUĆA OV

Broj: 02-05-1-____/17
Maglaj, 03.2017.godine

Svjetlana Zamboni

Pripremila:

Mirsada Skejić, viši referent za rad, radne odnose i ljudske resurse

